

ներ՝ հազուագիւտ և ազնուացրած պտղատու ծառերով և վաղերով: Բայց այդ ազնիւ ծառերից գոնէ մի հաս ոչ ոք չի կտրել կամ արմատախիլ չի արել մինչև ցարդ՝ նրանց մշակող տէրերին ֆլասելու դիտաւորութեամբ: Միայն այս կողմից կարելի է հետևել Խրիմցի ժողովրդների բարի օրինակին, չնայած, որ այնտեղ էլ թէև մահմեդական թուրքեր և թաթարներ շատ կան, բայց կովկասի թուրքերի պէս անխիղճ մարդասպանութիւն, գողութիւն, աւազակութիւն և սոսկալի բարբարոսութիւններ չեն անում նրանք»: Ընթերցող, երևակայեցէք իմ անմխիթար դրութիւնըս. համեմատական օրինակներ բերելուց յետոյ բարեկամներիցս ոմանք ասում էին իմ ականջիս. «Տէր-տէր ջան, այդպիսի բաներ մի տար մեր միամիտ ժողովրդի մօտ, ապա թէ ոչ՝ կասեն այնքան քաղաքներ ու աշխարհներ տեսած քահանայ մարդ սուտ և անհաւատալի բաներ է պատմում մեզ: Բայց եթէ ձեր պատմածները ճիշտ լինին, այն ժամանակ կարելի է ասել, որ Խրիմը մի դրախտ է և նրա բնակիչներն էլ կատարեալ հրեշտակներ են. երանի՛ նրանց, եթէ այդպիսի խաղաղ երկրումն են ապրում»:

Ուտիացոց աշխարհի ընդհանրապէս բոլոր ազգաբնակչութեանց և մասնաւորապէս Ջոռլու, Միրզաբէկլու, Սուլթան-Նուխու և մասամբ Նիժ գիւղաքաղաքի խաղաղ և աշխատասէր երկրագործ ժողովուրդների համար սոսկալի պատիժ ու պատուհաս են եղել և են Հայից դարձած Բոււ գիւղի հարուստ և զօրաւոր թուրք բէկերը, որոնցից